


Қуръон ва суннатга хилоф нарсани даъво қилувчини тасдиқлаш ҳаром



23:41 / 02.12.2016 3628

Фолбин ва башоратчиларни ва Қуръон, Суннат ва ижмоъи умматга хилоф (нарсани даъво) қилганларни тасдиқ қилмаймиз.

Шарҳ: Яъни, фолбин ва башоратчи айтган гапларга ёки Қуръон, Суннат ва ижмоъи умматга хилоф нарсани даъво қилганларнинг гапига ишонмаймиз. Фолбин, араб тилида коҳин, дейилиб, келажакда бўладиган ишларни, махфий сирларни билишни даъво қилувчи одамдир.

Башоратчи, араб тилида ароф, дейилиб, баъзи аломатларга қараб, мисол учун сўровчининг гапига, ишига ёки ҳолига қараб, ўғирланган нарсанинг қаерда эканини, йўқолган нарсанинг жойини ва шунга ўхшаш нарсаларни билишни, даъво қилувчи шахсдир. (Мажмаъул Биҳор 4-450)

Далил:

1-Пайғамбаримиз соллаллоҳу алайҳи васаллам: «Ким ароф - башоратчига келса ва ундан бир нарса ҳақида сўраса қирқ кунгача намози қабул қилинмас»-деганлар. (Муслим ва Аҳмад ривоят қилганлар).

2-Абу Ҳурайра розияллоҳу анҳудан ривоят қилинган ҳадисда Пайғамбаримиз соллаллоҳу алайҳи васаллам: «Ким арофга - башоратчига ёки коҳин-фолбинга келсаю унинг айтганини тасдиқланса, батаҳқиқ Муҳаммадга нозил қилинган нарсага куфр келтирибди», деганлар. (Аҳмад ривоят қилган).

Мунажжим-юлдузга қараб фол очувчи-ҳам «Арроф» ҳисобланади. Сўровчининг ҳоли шу бўлса сўралувчиники қандоқ бўлар экан?

Имом Бухорий, Имом Муслимнинг «Саҳих»ларида ва Имом Аҳмаднинг «Муснад»ларида Оиша онамиздан қуйидаги ривоят келтирган: «Расулуллоҳ соллаллоҳу алайҳи васалламдан коҳинлар ҳақида сўралди. У зот соллаллоҳу алайҳи васаллам: «Ҳеч нарсага арзимайдилар»-деб жавоб бердилар. Шунда одамлар: «Эй Аллоҳнинг Расули, улар аҳёнан ҳақ нарсани айтадиларку?»-дейиши. Расулуллоҳ соллаллоҳу алайҳи васаллам : «Ўша бир оғиз ҳақ сўзни жин илиб олиб, ўз дўсти қулоғига қуийиб қўйган бўлади. У эса унга юзта ёлғонни қўшиб айтади»-дедилар.

Имом Бухорийнинг «Саҳих»ларида келтирилган ҳадисда Пайғамбаримиз соллаллоҳу алайҳи васаллам жумалдан: «...ва коҳиннинг олган ажри ҳаромдир»-деганлар.

Фолбинлик учун олинадиган ҳақнинг ҳаромлигига ҳамма иттифоқ қилганини Имом Бағавий ва қози Иёз ҳамда бошқалар таъкидлаганлар.

Юлдузга қараб, турли нарсалар билан қуръа ташлаб, майда тошлар билан ва турли чизиқлар билан фол очадиганлар оладиган ҳақ ҳам, шунга биноан ҳаромдир.

Мунажжимлик (астрология) ҳунари-ердаги бўладиган ҳодисаларга фалакдаги ҳолатга қараб башорат қилиш-Қуръон ва Суннатда ҳаром қилинган ҳунардир. Балки, буни ҳамма Пайғамбарлар ҳаром қилганлар.

Ислом давлати болшиғига, ишбошиларга ва ҳар бир қодир одамга мазкур мунажжим, фолбин, башоратчи, ром очувчи, қуръа ва тош ташловчиларни йўқ қилиш возибдир.

Мазкур нарсаларнинг ҳаромлигини билиб туриб, уларни йўқ қилишга қудрати етиб туриб, ўз бурчини адo этмаганларга: «Улар ўзлари қилган мункар ишдан бир-бирларини қайтармас эдилар. Қилган ишлари қандоқ ҳам ёмон», (Моида сураси, 79) ояти кифоя қилади.

ҚУРЪОН ВА СУННАТГА ХИЛОФ БЎЛГАН БУНДОҚ ИШЛАРНИ ҚИЛАДИГАН ШАХСЛАРНИНГ ТУРЛАРИ

Бундоқ ишларни қиладиганлар уч турга бўлинадилар:

1-Алдамчи, ёлғончи ва ҳийлакорлар тури. Булар содда одамларни турли йўллар, макр-ҳийлалар, ўзида йўқ хислатларни бор, дейиш билан алдаб кун кўрадилар. Булар қаттиқ уқубатга лойик кишилардир.

2-Бу ишларни сеҳр йўли билан қиладиганлар. Жумҳури уламолар, жумладан, Абу Ҳанийфа, Молик ва Аҳмад раҳматуллоҳи алайҳилар сеҳргарни ўлдириш лозимлигига иттифоқ қилганлар.

3-Улардан баъзи турлари, шайтоний ҳолатлар, ёлғон кашфлар ва ғайбдаги

одамларга хитоб қилиш ҳақида ва бошқа турли ғаройиб ҳолатлар ҳақида гапириб валийликни даъво қилувчилардир. Аслида эса, булар-мушрикларнинг биродарлариидир.

УЧИНЧИ ТУРДАГИ АХЛИ ЗАЛОЛАТЛАРНИНГ ФИКРЛАРИ

Улар уч фирмага бўлинадилар:

1-Биринчи фирмадагилар, ўзларига одамлар кўрингани, ўша кўринган одамлар уларга бўйсимишини айтганларини даъво қиласидилар.

2-Иккинчи фирмадагилар, Аллоҳ таолога етишининг Пайғамбарлар йўлидан бошқа йўли ҳам борлигини даъво қилишади. Бу очик куфр ва равshan динсизликдир. Чунки, Аллоҳнинг наздида Исломдан бошқа дин йўқдир. «Ким Исломдан бошқани дин, деб изласа, асло ундан қабул қилинмас ва у охиратда зиёнкорлардандир». (Оли Имрон сураси, 85)

3-Расулуллоҳ соллаллоҳу алайҳи васаллам доираларидан ташқарида валийликни даъво қилувчилар. Улар: «Муҳаммад соллаллоҳу алайҳи васаллам зоҳирий ва ботиний тоифаларга пайғамбардир»-дерлар. Улар аслида У зот соллаллоҳу алайҳи васалламнинг динларидан жоҳилдирлар.

Ҳақиқатда эса, уларнинг барчаси шайтоннинг малайлариидир. Ғойб одамлари, деганлари жинлардир. Жинлар ҳам, «одамлар»-дейилади. Қуръони каримда: «Албатта инсдан бўлган баъзи одамлар, жиндан бўлган баъзи одамлардан паноҳ тилар эдилар. Бас, улар аларга туғённи зиёда қилдилар», (Жин сураси, 6) дейилган. Инсни кўзга унс бўлганлари, яъни, кўринганлари учун инс, дейилади. Инсда қўздан йўқолиши-йўқдир. Аммо жин ва фаришталар қўздан йўқолурлар. Шунинг учун «Ғойб одамлари» фақат жинлардан бўлиши мумкин, холос.

Баъзи кишилар Раҳмон авлиёлари орасидаги фарқни билмаганларидан адашадилар.

Баъзилар, фуқаролар уларга ўз ҳолларини топширадилар, дейишади. Бу ботил гапдир. Вожиб шулки, уларнинг ишлари ва ҳоллари шариати Муҳаммадияга солиб кўрилиши лозим, мувофиқ келса, қабул қилинади. Мухолиф келса, рад қилинади. Пайғамбаримиз соллаллоҳу алайҳи васаллам: «Ким, бизнинг амримизда йўқ ишни қилса, у раддир»-деганлар.

Расулуллоҳ соллаллоҳу алайҳи васалламнинг тариқатларидан бошқа тариқат йўқ. У зотнинг динлари ҳақиқатидан бошқа ҳақиқат йўқ, У зотнинг шариатидан бошқа шариат йўқ. У зотнинг ақидаларидан бошқа ақида йўқ. Ҳеч ким Пайғамбар соллаллоҳу алайҳи васалламга ботиндаю, зоҳирда эргашмасдан туриб, Аллоҳнинг розилигига, жаннатига ва кароматига эриша олмайди.